

Ajngóó ri'ji jmaa rigaba

Mbá mbi'ji, mbáá ri'ji phú mitsi'yáa nde'yaa.
Phú mitsaan' mǎnda'khoo ri'jiu. Mbámbá tsetsíí
nanújngúún tsú nandúún muxkhajmaa, xú'khu má
nandúun munijuiin manjaa. Khamí tsé'ngoo
akuní úxkhajmaa, numuu rí ikhí gí' mbáá rigaba
tsú phú mixkawijí' mǎnda'khoo. Ikhaa ajngóó
nimbáá tsé'ngoo atiuun áxkhajma ri'ji.





A'khui ne'thá ri'ji ne'thúun rigaba:

—Xúgi' nathaan' rí náá xára'júun gií rá,
numuu rí phú mixkawiin' mąnda'khoo.
Naxúwuun' xąbu ithani. Tsíyoo áwá'nii rí
muxkhajmúy, numuu rí xta'júun gií'. Ayu'
mitsínguá' náą xúyaa' xąbu.



A'khui niri'jñaa la rigaba:


—Méján'. Ma'gá xú'khü rá, numuu rí
naxúwáan' wéñuu' eni.

A'khui rí nigájnuu rigaba nekā mitsínguá'.

Mbayuu' má nekee, ríndoo ne'khaa li á'yoṓ
mú xóó' wíji ri'ji.





Ikhú nde'yoṓ rí nánguá mitsaan' ri'ji. Wámbá
rí mitsi'yáa, khamí ne'ni mujmu' inúú, xú'khu má
wámbá ñikataa inúú ri'jiu.



À'khuì ne'thúún rìgaba rì'jì:


—Náá numuu rí phú migínáá wéñuu' rá, khá
ikháán phú mitsi'ñáá mǎnda'khoo n̄yu rá. Khamí
ikhúún, nithayo' rí phú mitsagúún.





À'khuì niri'jñaa la rì'jì:


—Àjndoo nákhí mbi'ji rí nigájnaa' giì, niwá'
tsú ninì gínúú, xú'khu má niwá' xukú' tsú ni'phu
inú' khamí ni'phì inúú rì'jiu'. Ikhaa ajngóó nandoo
ájáñú' rá. Indóó nanda'jaa' rí náá xádxú' rá.



À'khuì niri'jñaa la rìgaba:

—Nákhí mbi'ji rí mitsi'ñáá, nithayo' rí phú
mitsagúún, khamí xúgì' rá, nda'yáa' jmaa nindxu'.





A'khui e'thá ri'ji:

—Athani mbaa atiaan', numuu rí ikhúún
niyaxi-míná' rí phú gí'doo numu', khamí ikháán
niyaxaa' rí ndaa' numaa'. Khamí xúgi' ndayoó rí
xógíñáá'lú gí'doo numa'lú.

Xkhua'nii ja'ñúú xabú tsú nuxuxi-mijna
manda'khoo xú rí nikuxi-mina' ri'ji rígi'. Tikhuun
angyuun'lú nuyaxuun rí ndaa' numúú mbá jayuu',
khamí xógíñáá'lú gí'doo numa'lú. Numuu rí
Ana'lú Mekhuíí nandoo ja'ya'lú xógíñáá'lú. Ikhaa
numuu rí nijunguaa' Adióó tsú mbáwii ne'kha náa
inuu numbaa' rígi' jmaa numa'lú. Ngaá ikhaa má
ne'sngaa rí maga'lú ju'ya-mijná xógíñáá'lú.

Xkhua'nii iyámbá ajngóó ri'ji jmaa rigaba.